



# PENSEO

*N-ro 226*

*aŭg. / 2010*

Monata Beletra Revueto en Esperanto  
Honorita de Premio Grabowski, 1994

Fondita en 1990; Enretigita en 1997 la 21-a jaro <http://www.elperno.cn/penseo/penlisto.htm>

## Josip Pleadin (Kroatio)



### Neplenumita Revo

Perforte la vivo ŝiris min kun radiko  
el patra lulilo dum tempo de mizero.  
Forĵetita dise kiel sensema spiko  
mi vagas kaj loĝas en kaduka kamero.

En fremda mondo plantita laborskklavo  
vegetas sen amo, konsolo kaj espero.  
Albume mutas fotoj de morta praavo.  
Korŝire frostas kaj vintro kaj somero.

La sola deziro: reveni al patrujo,  
dum peza laborado fleksas mian spinon.  
Neplenumita revo: en hejma florbedo  
albrustigi kaj kisi maljunan patrinon.



## Erzsébet Tuboly (Hungarujo)



### Hajlo

El mornaj nuboj  
Glacibulojn ĵetadas  
Ĉielaj buboj

Ĉielaj buboj  
Vidantaj homajn larmojn  
Hurlege ridas



## Anna Karlik (Hungarujo)



### Sen vi

Sen vi  
mi ne povas  
utila esti

Hajkoj pri junia vetero  
Junia frosto  
Triste tremas la plantoj  
Suno sin kaŝas

Tridekkvar gradoj  
Svenas plantoj, la natur'  
Pluvon sopiras

Pluvas, pluvegas  
Jen ĉielaj kanaloj  
Elverŝas akvon

Pluvas, pluvegas  
La vento furiozas  
Arbojn elteras

Pluvas, pluvegas  
Ŝtonoj en akvon dronas  
Etas la homo

Pluvas, pluvegas  
Inundo ĉion kovras  
Sunon ni sopiras

Sen vi  
mi ne emas  
ion ajn festi

Sen vi  
ŝajnas esti  
mi duonhomo

Sen vi  
malrapidas  
ĉi duonhoro

Sen vi  
mi ne havas  
bonan humoron

Sen vi  
mi ne sentas  
bonan odoron

Sen vi  
eĉ mi vidas  
la mondon grize

Sen vi  
mi komprenas  
ja ĉion mise

Sen vi  
mi sukcesas  
nenion fini

Sen vi  
mi kapablas  
neniun fidi

Sen vi  
mi solecon  
komencas timi

Sen vi  
mi verdire  
ne indas vivi

Sen vi  
mi kelkfoje  
perdas la forton

Sen vi  
mi volonte  
elektus morton

Sen vi  
mi sekrete  
larmetas foje

Sen vi  
do, nenio  
okazas bone



### Attila József (1905-1937)



statuo de József

## Ribelo de geamantoj

### Imre Szabó (Hungarujo)



tradukis el hungara lingvo

Alvenos tiu nokto, kies  
stelaro ĝis la koroj brulos.  
Kun flagraj haroj, melodioj

ribelaj geamantoj kuros.

Kantante al la bordo portos  
ĉiu la karan, ruĝan pezon.  
Apertos vaste muĝa maro  
kaj ili ĵetos ĉion en la mezon.

– Vi venkis, ni reportis amon,  
la gustojn ni reportis, ploron,  
katenojn niajn nun reprenu,  
bandaĝu vian kordoloron.

Jen, prenu niajn ĉaptintilojn  
pajacajn, kronon de l' esperoj,  
saketon da faruno, tristan,  
gluan manplenon da vinberoj.

Akceptu ĵus-ŝiritajn frondojn,  
telerojn, balailon, korbon,  
la lertajn laborilojn, sed ne  
la liton – prenu nian korpon.

Kun fulgaj, braĝaj fruntoj ĉiuj  
knabinoj, knaboj kaŭras tremaj,  
vibrante al ili subŝvebas  
enorme grandaj lunoj plenaj.

La akvo pro l' donacoj multaj  
elvenas, ilin kovras trene,  
tamen ĝi muĝas vane, tio  
fortigas la kantantojn ene.

Knabinoj kantas: Jen ni, maro,  
amara sal' vi estas en ni, –  
kaj knaboj kantas: Jen ni, bordoj,  
amara mar' vi estas en ni.

Kaj sur harnodo nun la maro  
brilajn mortintojn lulas tinte,  
kolere, triste ĝi memoras  
pri l' amo jam silentiĝinte.



## Siv Burell (Svedujo)



### Pri la eventuala bono skribi poemojn

1.

Poem'  
povas esti la ekstrem'  
de la homaj diroj  
regulitaj kun barem'  
per duraj kondukiloj.

2.

Ĉu avantaĝ'  
ni poemojn faru?  
Almenaŭ sur paĝ  
ni inkon ŝparu.

3.

Kernece, kurtece  
estu la skribad'  
spritece, gajece  
ni vagu sur la pad' –  
la pado de poem'  
kun granda volem'  
saĝajn aĵojn diri  
kaj laŭdon akiri.

4.

Poemoj valoras  
skribitaj de vi  
sentoj koloras  
la tagon por mi.

5.

Verki poezie  
ho, granda labor'  
sed tute alie  
nur legi kun fervor'



# Ĉineske

## Manjianghong (Rivero

### Plenruĝa)

Ĉina fiksforma poemo el du strofoj kun po 11 versoj de 434,344,77,353 / 33, 33, 54, 77,353 silaboj respektive, laŭ rimaranĝo xxa,xxa,xa,xxa/xa,xa,xa,xa,xxa(x=senrima)

### Vejdo(Ĉinio)



## Kresko ĝis perfekteco

omaĝe al 30-jariĝo de Chongqing-a Esperanto-Asocio

—laŭ ĉineska skemo Manjianghong\*

#### I.

ni tiame  
junviglaj  
kun energi'  
flamanta  
kaj celtrafe  
klara konsci'  
prezentis nian lingvon  
jen al la tuta soci'  
fervore  
tage kaj nokte  
per pasi'

nuntempe  
en ebri'  
ankoraŭ  
ame ni  
ĝin diskonigas  
en pli kaj pli  
diversspecaj sektoroj  
ĝis pligranda dimensi'  
ni oldaj  
aktivas jam sen  
fantazi'

#### II.

nia rondo  
antaŭe  
startis de nul'  
kvazaŭ arb'  
malfortika  
en etmezur'  
al ĝi mankis viv-akvo  
ĝin ofte vipis tortur'  
de vento  
kaj ŝtormopluvo  
el natur'

nuntempe  
ĝi al tur'  
similas  
ĝia dur'  
povas rezisti  
jen kun sekur'  
kontraŭ forta tempesto  
kontraŭ adversa terur'  
plenregas  
en ĝi spirito  
nobla nur

## Santaici (Tri Terasoj)

Ĉina fiksforma poemo el kvar versoj de ses silaboj kun krucrimo.

### Cindy Mckee (Usono)



## Ni loĝas en ĉi arbaro

Akvon li posedas,  
ni ne rajtas trinki.  
Tra-uzino-fluo  
igas akvon stinki.

Arbojn ŝi posedas  
por produkti tablojn.  
Por preventi paŝi  
oni ŝnuras kablojn.

Lasu lin uzini,

lasu ŝin produkti,  
lasu nin posedi  
fontojn por plifrukti.



### Viktoro (Ĉinio)

## Knabina beleco en somero

sur ŝia vizaĝo  
brilas blank' malseka  
glate delikata  
nature senpeka

la rondetaj mamoj  
tremetas en skuo  
festenas l' okulojn  
virajn per log-ĝuo

ŝiaj blankaj brakoj  
kun svelta-longa formo  
sorĉas rigardantojn  
per luliga dormo

ha, ŝiaj femuroj  
prezentas altire  
lakt-jadan skulptaĵon  
amindan inspire

### Yanke (Ĉinio)

## Birdoj revenas

betonaj domegoj  
rifuzas kun certo  
birdojn en aero  
pro manko de verdo

nune jam revenas  
birdoj en amaso  
plantoj vivaj kreskas  
laŭ doma teraso

### Yulinling (Tintado en Pluvo)

ĉina fiksforma poemo el du strofoj kun 11 kaj 12 versoj respektive de 4,44, 644, 65,347 / 7,35,634,426,345 silaboj, laŭ rimaranĝo a, xa,xxa,xa,xxa / a, xa, xxa, xxa, xxa (x = senrima)

### Lily (Ĉinio)

## Nevideba vundo

en mia kor'  
ŝiaj perfid'  
skandal-malglor'  
tumultas senbride  
senkompate  
je ĉiu hor'  
mi kvazaŭe aŭdas  
subvoĉon en plor'  
internan  
el korfundo  
pro troa malbonhumor'

vere pro ŝia ignor'  
al mia  
persvada fervor'  
mi malesperiĝas  
kvazaŭe  
ĉe tigra vor'  
tute helpas  
nee  
mia pena labor'  
la vundo  
gravuriĝas  
en mia memor'



### Fendieer (Papilio)

ĉina fiksforma poemo el du samaj strofoj

kun po 8 versoj de 10,34,334,36 silaboj,  
laŭ rimaranĝo a, xa, xxa, xa (x=senrima)

## Vejdo (Ĉinio)

# Papilio en pluvo

pluvgutoj grase falas el ĉiel'  
batante  
en venta pel'  
la florojn  
la herbojn  
per vipkruel'  
ekĝemas  
ŝi sub verda ombrel'

la papilio vestita en bel'  
malseka  
trema pro gel'  
baraktas  
al ŝirmej'  
ŝia fier'  
jam foris  
el ŝia ĉiu ĉel'



## Cindy Mckee (Usono)

# Obeemaj

Obeemaj estas la infanoj.  
Ni ĝojas.  
Junaj manoj  
harditaj.  
Estonte  
la organoj  
lojalaj  
al sociaj planoj.

Patriote pafas al paganoj  
lojale  
la infanoj  
harditaj.  
Estante  
tiuj manoj  
turnitaj  
sklave al tiranoj.

## Cezar (Germanujo)



# Papilioj kaj anĝeloj

En pluvo knabo dancis sub ĉiel',  
kun ĝojo,  
sen iu cel',  
kun granda  
sentebri':  
Homa anĝel'  
sen pezo  
ŝvebanta kiel vel'.

Fuĝinta papilio jam sen cel'  
sur rando  
de pajlĉapel'  
ripozas  
jen sur ĝi:  
Besta anĝel'  
post pluvo,  
sen ŝirmo aŭ ombrel'.

## Kuxiangsi (Profunda Sopiro)

ĉina fiksforma poemo el du samaj strofoj  
kun po 8 versoj de 7,33,45,733 silaboj, laŭ  
rimaranĝo a,xa,xa,xxa (x = senrima)

## Eto (Ĉinio)

# Adiaŭado

per ĉagrena sentiment'  
mi volas  
en silent'  
la aeron de ĉi moment'

tristigas  
morna pent'  
ekŝvebas  
for kun vent'

mi domaĝas sen konsent'  
deŝiri  
sen atent'  
ve, de lasta bela prezent'  
plena je  
larm-torent'  
min kaptas  
ĝena sent'

### Cindy Mckee (Usono)

## Ĝis-lando

Ĝis-lando  
Sub la ĉiela tegment'  
lasita  
ĝis-fragment'  
eksudis, ame, sediment'  
por nova  
kontinent'  
kun larma  
firmament'.

Tie kreskas freŝa ment'  
el kisoj  
kaj turment'.  
Leviĝas de la orient'  
saluta  
sentiment'  
ĝis kuna  
okcident'.

### Lily (Ĉinio)

## Am' en silent'

Sidas sub luna krescent'  
mallhela  
ni kun sent'  
pasia en varma ferment'.  
Nin tiklas

friska vent'  
per milda  
dolĉa tent'.

Ni senvortas en silent'  
en brakum'  
kun prudent'.  
Kisoj iradas per frekvent'  
senĉesa.  
Ĉi moment'  
nin puŝas  
ĝis kontent'.



### Viktoro (Ĉinio)

## Vana pent'

kvankam kun inteligent'  
li lernas  
kun atent'  
nur al lernojara poent'  
li ludas  
sen prudent'  
petolas  
ĝis kontent'  
  
je ekzamena moment'  
li trovas  
sen talent'  
problemojn kaprompa turment'  
ve al li  
larmtorent'  
ne helpas—  
vana pent'



## Cezar (Germanujo)

# Folidanco

Foli' flugas en la vent',  
dancante  
kun kontent',  
petolas  
en konsent'.  
Jen sorĉo de l' prezent',  
forloga  
bild' sen pent',  
magio  
dum moment'.

Mi observas kun atent'  
kun freŝa  
vigla sent'  
aŭtunan ludon de la vent'  
en brila  
lumtorent'.  
Folidanc'  
estas tent'.

## Genglouzi (Kanto de Akva

### Horloĝo en Noto)

Ĉina fiksfirma poemo el du strofoj kun po  
ses versoj de 33,6;33,5; / 33,6;33,5 silaboj,  
laŭ rimaranĝo xaa,xbb / xcc,xdd (x=  
senrima)

## Cindy Mckee (Usono)

### Voĉoj de blankuloj kaj aglo al

#### mestizo

Dankeme  
civiliz'  
troviĝas en mestiz'  
duone.  
Abomen'  
pli hela, amen!

La grundo  
tre bruna  
kontraŭ volbo suna-  
predikas  
naturu  
pri blanka puro.

Topazo  
en vento-  
en tiu momento  
li sciis.  
Nur kriis  
aglo - li sciis.

Videblis  
la komun'  
kun la majesta brun'.  
Rompiĝis  
monolog'  
de blanka mensog'.



## Marina Jakovleva

### Esperantigis Igorj Ĥomjakov

# Mia feliĉa amiko

Li estas feliĉa homo! Al li ŝajnis, ke ajna  
monteto estas tombonteto, ke per kano  
kovrita apudvoja kanaleteto estas postsigno de  
“vojo de vikingoj al grekoj”<sup>1</sup>, ke per musko  
kovrita marĉeto estas restaĵo de granda lago.  
Se li trovas ŝtonon, kiu almenaŭ nemulte  
diferenciĝas de simpla ronda ŝtono, do li estas  
certa, ke tio estas postsigno de grandaj belegaj  
temploj kun oraj kupoloj, kiuj estis ĉi tie en  
komenco de dua jarmilo post Kristnasko en



nia ne fama loko...

Lin maltrankviligas ĉirkaŭaĵo de restaĵo Koloĵe, la fortikejo, kiun detruis en 1406 granda litova duko Vitovt.

Li estas certa, ke ĝi estis ne simpla fortikejo. Ĝi estis granda, belega urbo, konkuranto de Pskov<sup>2</sup>. Tial oni ne rekonstruis ĝin post detruo. Tial ne estas en kronikoj mencioj pri estinta grandeco de Koloĵe, ja la kronikojn skribis loĝantoj de Pskov...

Certe oni kreis kronikojn por ies interesoj, tio estas nediskutebla. Rusoj laŭ ekzemplo de lastaj cent jaroj bone komprenis, kiel oni skribas historion. De fotoj malaperis homoj, dronis en silento eventoj, nur eĥo de famoj kuris laŭ lando, misformiĝis kaj malaperis...

En malproksimaj tempoj ne estis multaj aĵoj. Ne estis ĵurnaloj, libroj, fotoj, presejoj. Sed estis argila vazaro malmultekosta sed tre delikata. Ajna loĝejo de homo nepre estas ĉirkaŭita per multaj balaajoj. Inter la balaajoj estas tiaj, kiaj ne povas putri. En niaj sablaj montoj inter ŝtonoj kaj rulŝtonoj ne estas pecetoj de ceramiko kaj ostoj... Estas morenaj restaĵoj sed ne restaĵoj de belegaj urboj...

Sed kian sencon havas tiu skeptika balbuto, se mia amiko estas certa, ke tio estas ĝuste tiel!

De frua printempo ĝis malfrua aŭtuno li veturas sur biciklo laŭ vojoj, vojetoj kaj padoj. Sur direktilo de fidela fera ĉevalo ĉiam pendas lia paperujo. En paperujo estas ĉio. Inkluzive estas lorno.

Ankaŭ en ĝi estas hakileto, kiu similas kuirejan hakileton, sed tiu hakileto estas tre akra. Pro neceso li povas per ĝi dishaki sufiĉe dikan branĉon, se la branĉo blokas lian skizitan vojon...

Estas en paperujo detala mapo de nia loko. Foje mia amiko kun admiro montris al mi tombontetojn, kiujn li markis per ruĝa farbokrajono.

– Kion tio rememoras al vi? – li flustris per emociplena voĉo.

Mi levis ŝultrojn, al mi tio rememoris nenion.

– Ja tio estas konstelacio de Granda Ursido!  
– li ekkriis.

Mi pririgardis mapon kaj diris:

– Tenilo de ĉerpilo estas turnita al alia flanko.

Sed por mia amiko tiuj tombontetoj estas certa atesto de ne tera deveno de niaj antaŭuloj aŭ atesto de kontakto kun aliplanedanoj en antikva tempo. Verŝajne tiuj aliplanedanoj instruis unuajn loĝantojn de tiu loko plekti bastoŝuojn kaj konstrui kabanojn el traboj per diversaj manieroj...

Certe mia amiko estas ne sola, kiujn maltrankviligas pensoj pri perditaj paĝoj de gepatra historio. El revuo al revuo, el libro al libro, el unu paĝo de Interreto al alia paĝo nomadas elpensoj pri granda pasinteco de slavoj ĝenerale kaj rusoj aparte. Biblio de tiuj adeptoj kaj apologianoj de estinta pagana grandeco estas “Libro de Veles”<sup>3</sup>, libro pri slavaj dioj: Perun, Daĵdjbog, Stribog kaj Mokoŝ. Ja oni tiel ne volas esti idoj de kaŝiĝa en arbaroj kaj marĉoj mizera popolo, kiu loĝis en malgrandaj kabanoj, sed en tiu tempo en Okcidenta Eŭropo, en Oriento, en Ĉinio, en Ameriko kaj tiel plu oni konstruis belegajn urbojn kaj templojn el brikoj kaj ŝtonoj!

Sed mi revenas al mia amiko.

Sola cirkonstanco, kiu malhelpas al li esti absolute feliĉa dum liaj biciklaj promenoj, estas homoj. Li estas certa, ke de post ĉiu arbeto lin observas malbonkoraj okuloj. Sed se li estos devigata defendi sin kontraŭ malamiko, do li venkos. En lia mirinda paperujo estas io, kio similas pneŭmatikan pistolon.

Foje en frua printempo ni iris laŭ malproksimaj vojoj serĉante ian antikvan ŝtonan krucon, kaj al ni ĵetis sin hundoj el ankoraŭ loĝata vilaĝo. Ili minace bojis plenumante sian devon, kaj amiko tre ektimis kaj decidis pafi.

Por eviti sangverŝon mi ĝentile ekparolis

kun hundoj, kaj ankaŭ feliĉe alveturis per aŭto ĉiloka loĝanto. Tial amiko ne batalis kontraŭ hundoj en malegala batalo (hundoj estis du).

En tiu printempo majo estis bonege varma, kaj amiko proponis al mi en festo Venko<sup>4</sup> aranĝi piknikon en belega senhoma valo super malgranda rivero. Vidaĵoj tie estas belegaj. Sed matene nemulte pluvis, mi rifuzis.

Vespere okazis telefona zumo.

– Estas bone, ke vi ne iris kun mi! – amiko diris. – Mi venis en hejmon jam en krepusko. Kaj dum vojo apud amastombo mi ekvidis iujn “nigrajn”<sup>5</sup>... Verŝajne ili malsanktigis!

Post dek tagoj en unu karesa maja tago mi trafis en tiu loko. Certe mi komence aliris rigardi “malsanktigita amastombo”.

Barileto estis sur sia loko, steleo kaj kronoj ankaŭ estis ĉi tie. Apud piedestalo de steleo staris plasta glaseto, kaj kuŝis oranĝa parteto. Ĉi tie oni rememoris.

Verŝajne amastombon (sur tiu loko dum Granda Patria Milito germanoj pafekzekutis multajn pacajn ĉi-lokajn loĝantojn) en Tago de Venko vizitis ciganoj. Kiel oni scias, ili tre suferis pro faŝistoj. Ili drinkis ĉi tie rememorante mortigitajn samgentanojn...

Plej amuza en tiu historio, laŭ mia opinio, estas tio, ke mia amiko ne havas slavan aspekton.

Li estas brunhaŭta nigrharulo kun brunaj okuloj. Tial estas strange, ke li parolas pri “la nigraj”...

Tamen malgraŭ ke mia amiko timas hundojn kaj ne simpatiis al homoj nek la blankaj, nek la ajnaj aliaj, li, mi ripetas, estas feliĉa homo. Li delonge trovis sian amon – gepatran regionon. Ĝiaj montetoj kaj lagoj, riveroj kaj valoj, arbaroj kaj herbejoj, reala historio kaj mitoj maltrankviligas lian poetan imagon. Jes, li estas poeto. Li verkas bonajn lirikajn versojn, ekzemple la tiajn:

Tie, kie super arbaro nubego ŝiris

Blankan ventron ĝis profundaj vundoj,

Sunsubiro kiel sango fluas

Per alarma lumo de fremdaj landoj.<sup>6</sup>

Li revu kaj verku. Kaj ni atentos Dian fajreron, kiu lumas en lia maltrankvila romantika animo...

*Notoj:*

1. “Vojo de vikingoj al grekoj” – grava venda vojo tra Antikva Rusio en mezepoko.

2. Pskov – antikva urbo en nordokcidento de Rusio. En mezepoko ĝi estis granda kaj grava urbo.

3. “Libro de Veles” – mitoj kaj legendoj de antikvaj slavoj. Pli granda parto de specialistoj konsideras tiun libron kiel literaturan falsaĵon de deknaŭa jarcento.

4. Festo de Venko (Tago de Venko) – festo en la naŭa de majo, tago de venko de Sovetio kontraŭ faŝista Germanio en Granda Patria Milito (1941-1945).

5. “la nigraj” – malestima kromnomo de homoj, kiuj havas ne rusan naciecon.

6. Laŭvorta traduko el rusa lingvo.

## Guy de Maupassant



(1850-1893)

LA BLINDULO

Kio do estas tiu ĝojo de la unua suno? Kial tiu lumo kiu falas teren plenigis nin per tia vivofeliĉo? La ĉielo tute bluas, la kamparo tute verdas, la domoj tute blankas; kaj niaj ravitaj okuloj trinkas tiujn viglajn kolorojn, kiuj ĝojigegas niajn animojn. Kaj venas al ni envioj dancadi, envioj kuradi, envioj kantadi, feliĉa leĝereco de la penso, speco de plivasta tenereco, oni volus kisi la sunon.

Ĉe la pordoj la blinduloj, kun la vizaĝo senesprima en sia eterna mallumo, kiel ĉiam, restadas trankvilaj meze de tiu nova gajeco, kaj sen kompreni, ĉi minute ili kvietigas sian hundon, kiu volus kaprioli.

Kiam eknoktas kaj ili rehejmeniras, brako en brako kun juna frato aŭ eta fratino, se la infano diras: «La vetero estis bela ĉi-post-tagmeze!», la blindulo respondas: «Mi ja rimarkis, ke estis bela vetero, Lulu senĉese moviĝis.»

Mi konis unu el tiuj viroj, kies vivado estis unu de la plej suferplenaj homoj, kiun oni povas imagi.

Li estis kamparano, la filo de normanda farmisto. Tiel longe kiam la gepatroj vivis, oni kvazaŭe zorgis pri li; li ne tro multe suferis de sia horora handikapo; sed ekde kiam la gemaljunuloj forpasis, la kruelega ekzistado ekis. Kvankam lia fratino akceptis lin en sian hejmon, ĉiuj en la farmbieno trakis lin kiel almuzulo kiu manĝas la panon de la aliaj. Okaze de ĉiu manĝo, oni riproĉis al li troan forkonsumadon de nutraĵo; oni nomis lin jen pigrulo jen kampulaĉo; kaj kvankam lia bofrato ekkaptis lian heredoparton, li malvolonte donis al li la supon, kaj nur tiom, kiom sufiĉas por ke li ne mortu de malsato.

Li havis la vizaĝon tute palan, kaj du grandajn blankajn okulojn kvazaŭ sigelopanojn; kaj li restadis senpasia malgraŭ la insultoj, tiom malkonfidenca, ke oni ne sciis, ĉu li aŭdis ilin. Cetere li neniam konis iom da tenereco, lia patrino ĉiam iom malmilde traktis lin, ŝi malmulte amis lin; ĉar en la kamparo la senutilaj estas malutilaj, kaj la kamparanoj volonte agas kvazaŭ la kokinoj kiuj mortigas la kriplajn inter ili.

Post glutado de la supo, li iris por sidiĝi, somere antaŭ la pordo, vintre kontraŭ la kameno, kaj li ne plu movis sin ĝis la vespero. Li faris nek geston, nek movon; li nur palpebrumis en speco de nerva suferado, kaj iafoje liaj palpebroj refalis sur la blankan makulon de liaj okuloj. Ĉu li klare konsciis pri sia vivo? Ĉu li havis nur menson aŭ penson pri tio? Neniu sin demandis pri tio.

Dum kelkaj jaroj la situacio ne evoluis. Sed lia senpoveco por fari ion, tiel, kiel lia

senpasieco, finis incitegi lian parencon, kaj li fariĝis turmentato, speco de martiro-bufono, de viktimo forlasita al la denaska kruelegeco, al la sovaĝa gajeco, de la brutaloj kiuj ĉirkaŭis lin.

Oni imagis ĉiujn kruelajn ŝercojn, kiujn lia blindeco povis sugesti. Kaj por pagigi lin pro tio, kion li manĝis, oni faris de liaj manĝoj, horojn da plezuro por la najbaroj kaj torturon por la kripulo.

La kamparanoj de la proksimaj domoj ĉeestis al tiu aĉa distraĵo; oni diris tion unu al la alia, de pordo al pordo, kaj ĉiutage la kuirejo de la farmbieno pleniĝis de fiŝerculoj. Jen oni metis sur la tablon, antaŭ lia telero en kiu li ekis elĉerpi la buljonon, ian katon aŭ ian hundon. Instinkte la besto flaris la kripuleco de la viro, kaj malrapide alproksimiĝis, senbrue manĝis, delikate lektrinkis; kaj kiam langoklakado iom bruema atentigis la kompatindan ulon, ĝi singarde foriĝis por eviti la kulerofrapon, kiun li hazarde ĵetis antaŭ si.

Tiam estis ridadoj, puŝadoj, piedfrapadoj de la spektantoj amasigitaj laŭlonge de la muroj. Kaj li, sen neniam diri vorton, reekis manĝi per la dekstra mano, dum li antaŭante la maldekstran por protekti kaj defendi sian teleron.

Jen oni maĉigis al li korkojn, lignon, foliojn kaj eĉ malpuraĵojn, kiujn li ne povis distingi.

Poste, oni laciĝis eĉ je la serĉoj; kaj la bofrato kiu furiozis pro ĉiama nutrado al li, batis lin, senĉese vangofrapis lin, ridante pri la vanaj klopodoj de la malfeliĉulo por eviti la batojn aŭ redoni ilin. Tiam estis nova ludo: la vangofrapoludo. Kaj la bienservistoj, la kruda bofrato, la servistinoj, ĉiumomente ĵetis al li sian manon tra lia vizaĝo, kio provokis rapidan movon de liaj palpebroj. Li ne plu sciis sin kaŝi, kaj restadis senĉese kun la brakoj etenditaj por eviti la alproksimiĝojn.

Fine, oni devigis lin almozpeti. Oni alkondukis lin sur la vojojn dum la bazartagoj,

